



**FONO AOA O FAITULAFONO.  
LEGISLATIVE ASSEMBLY OF SAMOA**

**Lipoti a le Komiti o Mataupu Tau  
Faamasinoga, Leoleo & Falepuipui, ma  
Faamasinoga o Fanua & Suafa**

**i le**

**P.P.2014/2015 Nu.92,**

**Lipoti Faaletausaga a le Komisi o le  
Toefuataiga o Tulafono a Samoa mo  
le Tausaga Faaletupe 2012–2013**

**(Tuuina atu i le Fono Aoa o Faitulafono)**

**FAUTUAGA:**

**Ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoao ina ia faautagia lana Lipoti.**

**1. IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoao,

**Ina ia faamaonia P.P.2014/2015 Nu.92, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2012–2013.**

**2. FAUTUAGA:**

I le maea ai o Iloiloga a le Komiti na faaiugafonoina ai e fautuaina le Malo ina ia:-

1. **Tuuina atu le lagolago e ala i vaegatupe faatatauina mo le Komisi ona o le tele o ana galuega faatino taua o lo o fuafuaina mo le siitia o le auaunaga tuuina mo le atunuu lautele. ia silasila totoa i le taua o le faatinoina o galuega a le Komisi, ina ia mafai ona oo ma pai atu polokalame nei i le lautele o le atunuu atoa ma ia malamalama tagata uma i tulafono iloiloina a le atunuu.**

**3. SAILIILIGA:**

O le Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2012/2013, o lo o auiliili atu ai nisi o Polokalame o Fuafuaga Alualu Mamao ma Galuega Faatino na mafai ona ausia e le Matagaluega i totonu o lenei tausaga faaletupe e pei ona lipoti mai.

**3.1. TOFA MAMAO**

**Ina ia faavae le faatinoina o galuega e ala lea i le taulamua ma mafai ona faia suiga i le iloiloina ma le toefuataina o tulafono o Samoa**

**3.2. MANULAUTI**

**Ina ia mafai ona fesoasoani le Komisi ina ia faatumauina pea lava le lelei o Tulafono ina ia talafeagai ma le faaogaina e le mamalu o le atunuu**

#### **4. ILOILOGA A LE KOMITI:**

O le lipoti faaletausaga 2012-2013 a le Komisi o le Toefuataiga o Tulafono a Samoa, o lo o auilili mai ai tulaga o ana galuega tauave sa faatinoina i lea piriota ina ausia tulafono sao ma faigofie faatino e tusa ai ma ona malosiaga o lo o aiaia i lalo o le Tulafono a le Komisi o le Toefuataiga o Tulafono a Samoa 2008.

Na taua e le Komisi, e tusa ma le faagasologa masani a le ofisa i le toefuatai ma le toe lauliliuina o tulafono ua faasino atu e le Alii Palemia, le Kapeneta po o le Loia Sili, na mafai lava ona gafatia e le Komisi le faatautaiga o ana galuega e ala i faatalatalanoaga faalauaitele ma ana paaga ua fitoitonu ma sea mataupu seia oo lava i le tapenaina o lipoti faaiu ma agavaa mo le iloiloina e le Palemene. O nisi o lipoti po o poloketi autu sa mafai ona faataunuuina e le Komisi i totonu o lea tausaga faaletupe e aofia ai lipoti faatatau i le iloiloina o le Tulafono Faatonutonu a le Aufaasalalau; o le iloiloina o le Tulafono a le Faamasinoga Faaitumalo 1969; o le iloiloina o le avanoa ma le talafeagai o le iai o se Komiti mo Faasinomaga Faaleatunuu a Samoa; ma le iloiloina o le vaaia lelei ma le puipuia o tamaiti e pei ona iai noataga o Samoa i lalo o le Feagaiga a Malo Aufaatasi i Aia Tatau a le Tamaititi.

Na faamaonia mai e le Komisi, e 2 avanoa fou o le ofisa sa mafai ona taliaina e le Komisi o Galuega a le Malo i lea tausaga faaletupe e atoa ai le toa 14 o le faitau aofai o le afaigaluega o lo o ua iai i le taimi nei. O lo o folasia manino mai ai foi i leni lipoti faaletausaga se auivi po o se faataatiaga o lo o taoto iai le faatulagaina o le ofisa. E nao le lua Vaega o lo o vaevaeina iai tagata faigaluega o le ofisa, e iai le Vaega o Auaunaga Faaloia ma le Vaega o Auaunaga Lautele ma o lo o manino mai ai foi a latou matafaioi tauave o lo o faatinoina. Na taua e le Komisi, sa mafai ona maua nisi o fesoasoani i totonu o le tausaga faaletupe iloiloina e ala i ni Tagata Galulue Ofo Fuaina se toatolu mo le faatautaiga o nisi o ana galuega faatino. E tusa ma le molimau a le Komisi, o le manulauti lava o leni faamoemoe ina ia faalautele ma atinae le tomai o le afaigaluega a le Komisi i galuega toe iloilo faapea le atinaeina o agavaa aemaise o le fefaasoai o le malamalama ma le silafia i tulafono toe fuatai ma loia mai atunuu i fafo.

Na maua foi e le Komiti nisi o galuega faatino na ausia e le Komisi e aofia ai le faataunuuina o aoaoga aua le aotauina o le afaigaluega faapea polokalame faapitoa mo le faalauteleina o le tomai ma agavaa mo le afaigaluega. E pei ona taua e le Komisi, sa faatoa faatuina le Komisi i le tausaga 2008 o se vaega o le Ofisa o Loia Sili ma sa avea ai o se Matagaluega Tutoatasi I le tausaga 2011. Talu ai ona o se matagaluega fou leni i totonu o Galuega a le Malo, e iai le faamoemoe maualuga ma le taua i le atinaeina o tomai ma agavaa o lana

aufaigaluega. Na faaalua e le Komisi ma le pulega, na mafai ona mauaina le fesoasoani mai ana paaga I atunuu mamao e aofia ai le Komisi o le Toefuataiga o Tulafono a Niu Sila, le Komisi o le Toefuataiga o Tulafono a Ausetalia, Faalapotopotoga o Tulafono a Peretania ma Columbia ma isi. Na maua foi e le Komiti, e le gata ina maua e le Komisi fesoasoani eseese tau atinae mai atunuu i fafo, ae sa mafai foi ona maua le avanoa e nisi o lana aufaigaluega e auai atu ai i fonotaga po o polokalame faapitoa i atunuu i fafo mo le faamoemoe lava o le atinaeina o tomai manaomia a le Matagaluega.

Na faaalua se finagalo a le Komiti i le tulaga o le faatinoina o faatalatalanoaga a le Komisi ma tagata lautele o le atunuu ma fesiligia ai po o gafatia e le Matagaluega ona ufitai faalapotopotoga uma i nuu ma afioaga faapea ma pisinisi eseese i totonu o ana faatalatalanoaga nei. Peitai na taua e le Komisi ma le pulega, talu ai ona o le faafitauli o lo o tulai mai pea i le taimi nei, o le utiuti o le seleni a le Matagaluega, e le'o mafai ai ona aapa tele atu le malosi o ana faasalalauga mo tagata e fia malamalama atili pe fia maua foi se avanoa e faatalatalanoa ai i se mataupu po o tulafono o lo o iloiloaina. E ui ina o lea tulaga, o lo o taumafai pea le Matagaluega e faataunuu la latou matafaioi i le mafai gafatia mo le taliaina o manaoga a le Malo aemaise o le atunuu.

Matauina e le Komiti, sa tatau i le Komisi o le Toefuataiga o Tulafono ona tuuina mai faatasi lana Lipoti Faaletausaga ma ana Faamatalaga o Tupe ua maea ona sueina faa-suetusi i le vaitaimi o lo o iloiloaina. O lea tulaga, o le a mafai ai ona atoatoa ana iloiloga mo le faamaoniaina o tulaga tau tupe na faagaioia ai le Komisi, fuafua i vaegatupe na faamaonia e le Palemene mo ana galuega faatino.

Peitai na faamaonia mai e le Komisi, o lo o faagasolo galuega a le Ofisa o le Suetusi Sili mo le sueina faa-suetusi o ana vaegatupe o le vaitaimi o lo o iloiloaina. E le mafai foi ona atoatoa Faamatalaga o Tupe e tuuina mai mo iloiloga a le Palemene, sei vagana ua maea ona sueina faa-suetusi. Ae ona o le usitaia o aiaiga o le Tulafono mo le tuuina mai o lana lipoti Faaletausaga i le Fono Aoao Faitulafono, o le faapogai lea o le le aofia faatasi mai ai ma ana Faamatalaga o Tupe.

O se atugaluga na faaalua e le Komiti, o le Komisi o le Toefuataiga o Tulafono a Samoa o se tasi o pitolaau a le Malo e taua tele a latou matafaioi ma e tatau lava ona faatamaoigaina le i tulaga tau seleni ina ia gafatia le faataunuuina o ana galuega tauave. O le talitonuga a le Komiti, o le tele o nuu ma afioaga e le'o atoatoa le malamalama i le tele o tulafono o lo o iai

nei sei vagana ai a latou pulenuu po o sui o nuu. Ma o le silasila a le Komiti i lea tulaga, e tatau ona faataatitia manino iai se fuafuaga a le Komisi ma le pulega ina ia silafia uma e le atunuu le taua o a latou galuega tauave aemaise o tulafono eseese o lo o nafa ma le Matagaluega i le toe lauliliuina ma le toe fuataina aua le manuia lautele o tagata Samoa. E fautuaina ai e le Komiti le Malo, ina ia silasila totoa i le taua o le faatinoina o galuega a le Komisi, ina ia mafai ona oo ma pai atu polokalame nei i le lautele o le atunuu atoa ma ia malamalama tagata uma i tulafono iloiloina a le atunuu.

## **5. MOLIMAU:**

### **Komisi o le Toefuataiga o Tulafono a Samoa.**

Leota Theresa Potoi	-	Pule Faatonu
Pale Fuimaono	-	Sui Faatonu Sili
Malaea A Feterika	-	Pule o Auaunaga Lautele

## **6. TULAFONO TUMAU 173:**

E tusa ai ma aiaiga o le Tulafono Tuma 173, o le a avea ma tiute o le Komiti o Mataupu Tau Faamasinoga, Leoleo & Falepuipui ma Faamasinoga o Fanua ma Suafa:-

- (a) **Le Iloiloina o so o se Tulafono Tau Faaofi, talosaga po o so o se isi mataupu ua tuuina atu i ai e le Fono Aoa po o e tusa ai ma Tulafono Tuma; ma Tala Faatatau o Tupe po o le toe iloiloina o le faatinoina o galuega a Matagaluega e pei ona tuuina atu i ai e le Komiti o Tupe Maua ma Tupe Totogi a le Malo;**
- (b) **Iloiloina o Tulafono Tau Faaofi mo se mataupu faapitoa;**
- (c) **Le suesueina o faiga faavae, pulega ma tupe alu a matagaluega ma faalapotopotoga a le Malo po o nisi faalapotopotoga e fesootai ma tulaga puipuia o faamatalaga, faamatalaga aloaia, faamasinoga, auaunaga faa-loia, mataupu tau faamasinoga, leoleo, agafaalilolilo, faiga matuia taufaasese, fanua ma suafa.**

**7. IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoao,

**Ina ia faamaonia P.P.2014/2015 Nu.92, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2012–2013.**

**TUISA Tasi Patea**  
**TAITAIFONO**

**AFOAFOUVALE John Moors**  
**SUI TAITAIFONO**

**LAFATELE Patrick Leiatuaalesa**  
**SUI USUFONO**

**TAPUAI Toese Ah Sam**  
**SUI USUFONO**

**PAPALII Lio F Taeu Masipau**  
**SUI USUFONO**

**LENATAI Victor Fafoi Tamapua**  
**SUI USUFONO**

**LEFAU Harry Schuster**  
**SUI USUFONO.**

**Erosi Koria**  
**FAILAUTUSI O LE KOMITI**